

Gissiatavla radunonza generala dil

Forum cultural Tujetsch

Venderdis, ils 27 da november 2015, allas 20.00 uras en sala da sedutas en Tgèsa communal Sedrun

Protocol

1. Beinvegni e presenza

President Andre Schmid sa sulettamein beneventar 6 personas alla radunonza generala dil Forum cultural Tujetsch. En siu plaid da beinvegni dat el ina egliada anavos egl onn 1997, igl onn dalla fundaziun dil FcT. En ussa 18 onns existenza, hagi il FcT saviu executir numerusas causss en favur dalla cultura tuatschina. Cun uonn seigi il pli grond project ius a fin, che hagi custau quasi in quart milliun, numnadamein la sanaziun, restauraziun e conservaziun dallas ruinas digl anteriur casti da Putnengia. En in cuort memento seregordan ils presents da nies scribent Vic Hendry, ch'ei morts ils 17 da decemehr 2014. Pil FcT ha el giu gronda simpatia, ha susteniu nus e demussau grond interess per nossas activitads. El ei adina staus fetg engrazievels per nies engaschi en favur dalla cultura dalla val. Plinavon seperstgisa il president per la radunonza generala digl onn vargau che ha buca giu liug. En in communicau veva il FcT informau suandontamein la populaziun: Muort igl engaschi supplementar dil president dil FcT André Schmid, havein nus adina puspei stuiu spustar il termin per la radunonza generala digl onn 2014. La suprastanza ei sedecidida da buca prender suenter la radunonza generala. La proxima radunonza generala ha liug ils 27 da november 2015. Il president annunzia las suandontas perstgisas: Guido Friberg, Beni Hendry, Barla Monego, Imelda Monn, Seppa Schmet e Norbert Vinzens

2. Elecziun d'in dumbravuschs

Sco dumbravuschs vegn Margrit Cavegn, Sedrun, eligida.

3. Prelecziun ed approbaziun dil protocol dalla radunonza generala dils 31 da schaner 2014

Entras igl actuar vegn il protocol dalla davosa radunonza prelegida. Quella ha giu liug ils 31 da schaner 2014. Il protocol vegn acceptaus dil presents cun admetter in engraziament al nuder dil forum.

4. Rapport annual 2014/15

En siu rapport presidial fa il president André Schmid attents sin ils suandonts eveniments ed activitads succediadas el decuors dils davos dus onns.

2014

Puntnengia

El decuors da quei onn ha giu liug la tiarza e davosa etappa dalla sanaziun e reconstrucziun dil casti da Putnengia. Cun Felix Nöthiger e ses luvriers specialists, havein nus giu ina dallas pli qualificadas personas sin quei sector. El decuors dil meins uost tochen ocober ein mirs savni e puspei vegni reconstruiu a moda medievala. L'entrada el vest ha survegni in arviul e l'entira cantunada spegl esch ei vegnida reconstruida. Cun quella erecziun ha la tuor survegni bia dapli qualidad ed era ina cumparsa da vera paretta da casti.

Project Sumsassi

Davos quei project steva l'erecziun d'ina punt sul Rein cun ina reit da senda che cumpigliava era il casti. Ina cumpart fuva era la tuor panoramica egl intern dalla tuor. Ord motivs da finanzas e quei schegie che nus possedevan la lubientscha davart dils responsabels per la tgira d'edificis historics, stuein nus desister dall'erecziun dalla tuor. En vesta stat sulettamein la construcziun digl emprem plantschiu cun access sur ina scala. Quel purschess ina magnifica survesta en tuttas direcziuns, dil reminent ei quei punct da vesta immens magnifics. El porscha la pusseivladad da sedar giu cun historia e geografia, geologia e cultura dalla val.

Cumpra dil Milarit

El decuors dils emprems meins digl onn ei succedida la cumpra definitiva dil Milarit. Ussa astga il Museum La Truiaisch selegrar d'in dils pli custeivels minerals dil mund. Per propi, e quei en sia structura, fuorma e bellezza, ha el negina concorrenza.

Ina crusch sil Pass La Crusch

Ensemen cugl ustier dil Krüzli ha il FcT tschentau ina crusch sil Pass La Crusch. Il hotel Krüzli ha festivau il 100avel e quei ei stau in dils motivs da plazzar ina crusch, il simbol pil num dil pass. L'auter motiv ei segiramein quel ch'ina crusch sesanflava gia tschantaners sil pass. Ils 13 d'october 2104 ha ina grupp accumpignau la crusch e tschentau ella ein in liug veseivels per tuts viandonts e viandontas e quei gest sil cunfin denter Uri e Grischun.

2015

Putnengia

La primavera ha in tozzel commembers dil Club da ballapei Sedrun/Mustér fatg lavur cumina. Igl ei stau da schubergiar, adattar e formar il contuorn dil casti. Giusep Valier da Camischolas veva gia tard gl'atun giu tschentau ina punt sul foss ed uonn ha nies revisur Gion Giachen Monn eregiu in tschabergagl per la punt. Plinavon ha el construü el vest ina seiv da schurmetg. Cun la previda digl emprem plantschiu ella tuor, in esch medieval ed entginas tablas informativas vegn la lavur che ha cuzzau ussa 16 onns terminada cugl onn 2016.

Excursiun culturala

Curaglia ha in Museum Alpin ch'ei naschius entras gl'engaschi privat da Gallus Giger. Il FcT ha giu marveglias dalla cultura medellina ed ha organisau ina excursiun. Dudisch persunas interessadas han dau suatientscha agl invit ed els ein vegni remunerai cun ina bellezza rimnada d'exponats culturals dalla Val Medel. En in clavau tardiziunal ei la cultura exponida. Plinavon posseda signur Giger entgins vehichels agricols en sia garascha. A Mumpe Medel han ils participonts e participontas giu la caschun da mirar e perseguitar la funcziun d'in mulin. Gion Battesta Manetsch ha mussau e declarau siu mulin, sco era la resgia e fatg ina excurisun historica ellas relaziuns denter Tujetsch e Mompe Medel.

Excursiun sil Pass La Crusch

Quasi en memoria dalla crusch tschentada igl onn vargau, ha il FcT previu ina excurisun alpina sil pass cun presentar empau la historia da quella traversala che ha giu da temps vargai pulita impurtonza. L'aura ha duas gadas manegiau mal, ton che l'excursiun ei per propi dada ell'aua ni ella neiv!

Collaboraziun cul Museum La Truiaisch

Igl onn vargau veva il FcT susteniu e collavurau cul Museum La Truiaisch en connex cun l'exposiziun 11x3=33, in'exposiziun ensemen cun la scola da Sedrun. Uonn ha el segidau cun l'exposiziun da scalins. La dumengia dils 25 d'october 2015 ei stau organisau ina sentupada per tuts interessents dalla cultura da scalins. Films han mussau la cultura da scalins ed il puresser en nossa val. Numerus visitaders e visitadras han schau plascher, ton il grond diember da scalins, ils films e la purschida ord l'ustria dil FcT. Tempra da descargada e festiva han las Platialas da Sumvitg demussau cun marschar sil palz avon il museum e sunar entgins tocs alla numerusa raspada serimnada avon il museum.

Set da meisa

Il Hotel Cresta schai il pli favoreivel ella vischinonza dil casti da Putnengia. Aschia secapescha quei quasi da sesez ch'ils hosps vulan saver enzatgei da quellas miraglias. Ensemen cugl ustier Marcus Schmid ha il FcT creau in set da meisa cun ina foto dil casti e cun informaziuns historicas ed in schuldau da guardia per colurar pils hosps pli pigns. Il FcT patratga da cuntinuar cun quella idea cun auters aspects cultural-historics tenor igl interess d'autras ustrias e hotels dalla val.

Il Forum cultural a Samedan

L'organisaziun Museums Grischun ha organsiau il schaner a Samedan ina sentupada d'informaziun cul tema „Archivs culturals“. Il FcT ha astgau esser presents e presentar la situaziun co ei vegn rimnau ed archivau scartiras culturalas ella Val Tujetsch senza posseder in archiv cultural.

Archiv cultural

Dapi igl onn 1999 sestenta il FcT per la realisaziun d'in archiv cultural en nosssa vischnaunca. En Surselva dat ei tochen oz negins da tal gener, l'Engiadina ei pioniera sin quei sector. En tut dat ei oz el Grischun 17 archivs culturals e duas bibliotecas documentaras. In archiv cultural ei publics e rimna oravontut la cultura d'ina regiun, vallada ni vischnaunca. Aschia relaschs da persunas privatas, bibliotecas, fotos, films, maletgs e gasettas anflan leu il liug da documentar la historia e cultura. Igl archiv communal ei quel che archivescha ils fatgs politics ed administrativs dalla vischnaunca. Tuttina posseda igl archiv communal da quei da ver 180 scatlas che cuntegnan tuttas material cultural, leutier entginas bibliotecas e massa fotos, dias e films. Tut quei material stat in di a disposiziun per ina archiv cultural.

La situaziun ei semidada anetgamein. Ina persuna simpatisanta per la cultura tuatschina e per l'idea d'in archiv cultural en nosssa val, ha schenghegiu al forum ina gronda summa unida cul ferm giavisch ch'il FcT realiseschi in archiv cultural. Nus essan pli che ventireivels e savein bien grau ed ina tala gesta lai buca engraziar avunda. Ussa ein las portas aviartas per nies desideri e nos plans da varga in decenni. Nossas ponderaziuns van en direcziun da realisar in local pigl archiv cultural unius cul Museum La Truaisch, numnadamein egl ost da quel. Giavischeivel fuss ord nosssa vesta era quei mument l'engrondaziun dalla partiziun da mineralias e dalla sala ed ina nova entrada e quei entras la vischnaunca. Cul sustegn dil forum obteness la val en in liug in center cultural historic, il museum, in archiv cultural, ina biblioteca documenatra ed ina partiziun da mineralias per presentar nosssa cultura da cavar cristallas e las mineralias a moda pli intressanta ed efficienta.

5. Rendaquen, rapport dil revisur ed approbaziun dil quen

Il quen vegn presentaus da nies cassier Tumaisch Valier. La cefras ein vegnidas bravamein mudergiadadas entras la sanaziun dil casti, ton ch'il quen fa plitost ina paupra pareta. Nus sperein denton fermamein cul sustegn da nossas vischinas e vischins, fautors e fauturas en favur dalla cultura, en favur da nies engaschi per il manetniment da nossas ragischs culturalas e nosssa cultura viventa.

Survesta quen ordinari:

Entradas	11 274.15
Expensas	14 155.15
Fatg anavos 2013/15	2 881.00
Bilanza:	
Saldo dils 01-11-2013	4 059.90
Saldo dils 01-11-2015	1 178.90
Fatg anavos 2013/15	2 881.00

Survesta dil conto casti da Putnengia:

Entradas (2013 - 2015)	37 002.15
Expensas	44 092.05
Saldo per ils 1-11-2015	7 089.90

Bilanza:

Investau en quei object da 2003 - 2015 total: **246 556.10 frs.**

Saldo dils 01-11-2013	7 505.50
Saldo dils 01-11-2015	415.60
Fatg anavos 2013/15	7 089.90

Il revisur Gion Giachen Monn rapporta da sia revisiun. El hagi repassau, ensemen cul cassier, il quen ed anflau tuts mussaments e quittanzas necessarias. Il quen seigi menaus conform las pretensiuns dad oz ed el proponi d'acceptar il quen sco presentaus dil cassier cun dar scarica all'entira suprastanza.

Quei succeda unanimamein entars ils presents.

6. Contribuziun annuala

Sin proposta dalla suprastanza dil Forum vegn la contribuziun annuala laschada sco tochen dacheu.

7. Elecziuns:

a) suprastanza

b) revisur(a) da quen

Atgnamein fussen, tenor diember dils onns, las elecziuns veramein en roda, denton e damai che nus vein ord ils motifs gia sura allegai, schau curdar la radunonza igl onn vargau, vegn sin proposta dalla suprastanza spustau las elecziuns sin in auter onn.

8. Program da lavur 2016

Entginas caussas dil program da lavur dependan zun fetg da nossas finanzas. Nus vegnin pia a metter prioritads e far il pass tenor nossas forzas financialas avon maun.

Putnengia

A Putnengia ponderein nus da baghegiar en igl emprem plantschiu ella tuor. Per access survescha ina scala. Quei emprem plaun possibilitescha ina bellezza vesta en tuttas direcziuns. Plinavon duei l'entrada retscheiver in esch medieval. La senda al liug historic vegn marcada. Quella vegn colligiada culla via neu da Dieni e planisada da schar cuntinuar sur la punt da cuorsa liunga viers Rueras. Tablas d'informaziun dueien raquintar dalla historia dil casti e dalla val. Bugen organisein nus era excursiuns al liug cun explicaziuns davart la historia dil casti e da nossa vischnaunca. Il liug ei era adattaus per aperos per las pli diversas festivitads che crodan in onn ora.

Tablas d'informaziun

La val dumbra numerus objects culturas, oravontut patertgein nus vid las numerusas capluttas e baselgias. Vitier vegnan loghens ed edifecis historics, plazzas specialas ed auter. Gia dapi in temps ponderein nus d'informar en quels loghens cun tablas.

Viseta d'ina purschida culturala ella regiun

En nossa vischinonza dat ei biaras interessantas caussas culturalas. Ina da quellas lein nus era uonn possibilitar da visitar comunablaimein sut l'egida ed organsiazion dil forum.

Excursiun alpina

Nossa excursiun, stada previda sil Pass La Crusch, lein nus danovamein empruar da realisar e quei plitost el temps da stad.

Activitads cul Museum la Truaisch

La collaboraziun cul Museum La Truaisch lein nus bugen cuntinuar. Oravontut lein nus sustener las exposiziuns specialas. Duront igl unviern cuoza aunc l'exposiziun dalla cultura da scalins da nossa val. Per la partenza dalla sesiun da stad preveda il museum ina nova exposiziun speciala ch'il FcT sustegn ed accumpogna tenor pusseivladads.

Il museum ha en vesta la sanaziun e reactivaziun dil mulin el faner dasperas. Il FcT segida fetg bugen en caussa e metta a disposiziun igl agid tenor pusseivladad. En connex cun quei mulin, fuss era il mulin a Gionda in object da prender en vesta da sanar e crear aschia ina ulteriura attracziun culturala per la val.

Archiv cultural

Nossa lavur en caussa Archiv cultural vegn ad esser el center digl onn 2016. Nus selegrein, e cun nus speranza era Vus tuts amitgs dalla cultura tuatschina, da saver realisar in edifeci aposta per documentar nossa historia e cultura.

9. Varia

Dalla varia negin che fa diever aschia ch'il president sa surdar il plaid a consuprastont Tarcisi Hendry

per persentar il referat tenius a Samedan. Leu ha el giu da prender posiziun sin duas damondas, numnadamein: *Co documentescha igl archivar communal era la veta culturala da sia vischnaunca?* ed: *Experienzas d'ina vallada senza archiv cultural*. Alla fin dat el aunc ina vesta dalla situaziun actuala ella Surselva pertuccont ils archivs culturals en mira.

Terminaziun

Suenter quasi duas uras sa il president André Schmid serrar la radunonza cun engraziar a tuts per la participaziun. Cun las novas da saver realisar in archiv cultural en Tujetsch van tuts a casa enrihi cun aspects positivs per la cultura tuatschina.

Sedrun, igl 1. da december 2015

Igl actuar:

Tarcisi Hendry